



بكل قلم قصة

أسماء هيثم حمود

بكل قلم قصة

بكل

قلم قصة

أسماء هيثم محمود

أسماء هيثم محمود

بكل قلم قصة

نسمات الادب للنشر الإلكتروني

تستعرض لكم دار نسمات الأدب للنشر

الإلكتروني بعزيمة وإبداع جديد

الكتاب: بكل قلم قصة

المؤلف: اسماء هيثم محود

غلاف الكتاب: رزان محمد كليب

موك اب الكتاب: سها منصور

تنسيق داخلي: وسيم الزهري

تدقيق لغوي: رزان محمد كليب

إدارة الدار: رزان محمد كليب

مع نسمات الأدب، أفكارك تنبض بالحياة!

نسمات الادب للنشر الإلكتروني

أسماء هيثم محمود

إهداء:

في هالعالم المليان وجع كل واحد فينا
حامل قلم، بس مو الكل بيكتب.

في ناس بتدفن الحكي جواتها وفي ناس
بتحكي للعممة وفي ناس، متلي، قررت
تكتب.

هالرواية مو قصة وحدة هي وجوه،
أصوات، قلوب عم تتبض بالحكي، حتى
لو انكسر صوتها زمان.

بكل فصل راح تلاقوا قلم جديد يمكن
تلاقوا حالكن بين السطور، يمكن تدمع
عيونكن، أو تحسّوا إنو في حد غيركن
مرّ بنفس النفق المظلم وطلع منه.



"مش ناقصة"

في أشياء بالحياة ما مختارها، بتولد
فينا أو نحنا مننولد فيها، ما مختار
شكلنا، ولا حالتنا، ولا بأي بيئة منعيش،
بس للأسف العالم صارت تحاسب
الشخص على شي الله كتبه عليه.

هي أول جملة كتبتها سيلين بدفترها.
سكّرتة بعصبية، ومسحت دمعة نزلت
من عينها.

كان هالدفتر صديقها الوحيد، يلي
بيعرفها أكثر من حالها، يلي ما بيحكم،
وما بيجرح.

سيلين بنت عمرها 17 سنة، بس الهم
يلي شالته من هي وصغيرة، بيوجع
الكبار.

بكل قلم قصة

نسمات الادب للنشر الإلكتروني

انولدت طبيعية، بس الحرب، والضغط،
والأزمات غيَّروا كل شي بجسمها
الصغير.

مرض نادر، نادر لدرجة إنو كل دكتور
بيقرا تقاريرها، بيهز براسه وبيقول:
"ما عنا علاج، بس استمري بالعلاج
الفيزيائي."

نهار بارد من سنة 2022، كانت سيلين
متسطة على التخت، تعبها ظاهر على
ملامحها.

سيلين: ما عاد بدي روح عند دكتور،
مليت، فهموا ما في أمل!

ديما (أمها): لا تيأسي من رحمة الله،
لسا عمرك 15 سنة، وجسمك عم

بكل قلم قصة

نسمات الادب للنشر الإلكتروني

يستجيب شوي شوي. قومي البسي،
أبوكي ناظرنا.

راحوا عند دكتور بالشام، وبعد انتظار
طويل، قال الدكتور نفس الكلام: الأفضل
تستمرري بالعلاج الفيزيائي. في أمل
بسيط بعملية ممكن تحسن المشي شوي.
رجعوا عالييت، وسيلين كانت حافظة
هالكلام.

فتت ع غرفتها، غمست وجهها بالمخدة،
وصارت تبكي.

سيلين بصوت مكتوم: يا رب، تعبت،
خدني وريحني.

من بعد هالزيارة، سيلين بطلت تحكي
مع حدا.

بكل قلم قصة

نسمات الادب للنشر الإلكتروني

أيام المدرسة صارت ثقيلة، وكلام الناس
ونظراتهم كانت أقسى من التعب
الجسدي.

"أوقات الصوت بيصرخ جواتنا، بس ما
بيطلع. مو لأنو ما بدنا نحكي، بس لأنو
ما حدا ناوي يسمع."

كلام البنات كان جارح، وسيلين تسمع
وتسكت، ترجع عالي بيت وعيونها حمر.

ديما بحزن وهي تضمها: الله ما خلقك
ناقصة، ولا غلط. نحنا معك دائماً.

سيلين: يمكن الله ما خلقتي غلط، بس
العالم شايفيني هيك.

قررروا أهلها يغيّروا المدرسة، بس
المشكلة ما كانت بالمكان، المشكلة كانت
بنفوس العالم.

بكل قلم قصة

نسمات الادب للنشر الإلكتروني

نفس التتمّر، نفس النظرات، ونفس
الوحدة.

"ما كنت ناقصة، بس كنت وحيدة. ما
في حدا سمع صوتي، ولا حتى صوت
أنيني."

لكن بالبيت كان في سند.
أمها، أبوها، وأخوها الصغير ما تركوها
لحظة.

كل مرة ترجع حزينّة، يحيطوها بحب
ودفا، وكأنهم جدار بيحميها.
صارت الموسيقى مهربها الوحيد.

تخط الساعات، وتكتب، وترسم على
الهامش قلوب مكسورة وعيون دامعة.

بكل قلم قصة

نسمة الادب للنشر الإلكتروني

وبليّة، فتحت حساب بالسوشال ميديا،
مو لتتواصل، بس لتكتب وتفضفض
بصمت.

بها المرحلة تعرّفت سيلين على صديقة
افتراضية اسمها "إيلين"، كانت
متفهمة، صادقة، وبتضحكها، أقرب
وحدة صارت لسيلين.

كل يوم يحكوا، يضحكوا، يشكوا لبعض،
ويحلموا مع بعض.

إيلين: سوس، انتي بتعرفي إني بحبك
أكثر من حالي؟

سيلين بضحكة خجولة: ولي! شو في؟
عم تخوفيني.

إيلين: بدي خبرك شي... أنا معي مرض
بالقلب، فتحة خلقية، من وأنا صغيرة.

سيلين منصعة: ليش ما خبرتيني من قبل؟

إيلين: ما بدي زيدك همّ، اللي فيكي مكفيكي، أنا شايفتك عم تحاربي، فقلت خليني أنا خبي وجعي شوي.

سيلين وعيونها عم تدمع: بس أنا كنت رح كون جنبك، مثل ما انتي كنتي جنبتي.

إيلين: أنا بشوفك أخت، وروح تانية، بس هالفترة يمكن ما عاد افتح الجوال، أهلي محافظين ومتشدددين ومش مرتاحين للنّت.

سيلين: لا تروحي، وعديني إنك ترجعي.
إيلين بهمس: وعد، وإذا ما رجعت، اعرفني إني كنت بحبك كثير، خليك قويّة لا تزعلي.

وسكّرت الحساب؛ الصورة تغيّرت:
"مغلق مؤقتًا، يمكن يوم، يمكن شهر،
يمكن طول العمر."

مرّ شهر، سيلين كل يوم تبعت، وتنتظر،
ولا رد، لحد ما شافت صورة على
ستوري بنت عم إيلين: "إنّا لله وإنّا إليه
راجعون، رح نشترك يا صغيرة العيلة."

كانت الدموع سابقة عقلها، راحت تبعت
تسأل: إيلين رفيقتي وين؟

بنت عمها: عطتك عمرها، ادعيها
بالرحمة.

كل شي توقّف: الصوت، النفس، الدم،
القلب.

حسّت حدا سحب منها نصّها، إيلين
كانت الوحيدة اللي فهمتها، وراحت.

سيلين صارت تنهار، كل شي توقّف:
النفس، الصوت، الدم، والأمل.

أهلها ضموها، وبكوا معا، وأبوها قال:
يا بنتي، نحنا هون، ورح نضل هون.

حتى الطيبة النفسية اللي راحت لعندها،
قالت بعد ما سمعت قصتها: في حب
بيكون شفاء، وإذا راح، بيرجع الوجع
كله.

كل الناس كانت تذكرها بمرضها، حتى
القريين منها، بس أهلها كانوا يذكروها
دائمًا بقيمتها، بجمالها الداخلي، وبإنها
مش لوحدها.

"أنا ما طلبت المرض، ولا طلبت الوجع،
بس ما عاد بدي شي من حدا."

قررت تسكّر على الكل إلا رب العالمين،
رجعت تصلي، تبكي على السجادة،
وتقرأ قرآن، لبست النقاب، وبلشت
تحس بقيمة حالها، صارت تحب عقلها،
صبرها، وإنها مختلفة.

"الوجع خلاني قوية، والدين رجّلي
روحي."

مش كل مريض ناقص، ومش كل وجع
ضعف، ومش كل حب حب، بس كل قرب
من الله شفاء.

سيلين رجعت تعيش مو مثل الناس، بس
مثلها هي، بقلب مؤمن، وعقل واع،
ونفس راضية.

رجعت تمسك القلم، وفتحت دفتر جديد،
بس هالمرة ما كتبت له لتبكي، كتبت له

لتشارك، وكان أهلها أول قارئين، وأكبر مشجعين.

كتبت عن القهر، عن الألم، عن الصبر، عن النور، وكل حرف كان صادق، طالع من قلب موجوع صار قوي.

صارت تنشر مقالاتها على الإنترنت، وبعدين جمعت كتاباتها، ونشرت أول كتاب بعنوان: "مش ناقصة"، وصار الناس يقرأوا كلامها، ويتأثروا، ويبكوا، ويتعلموا، وأهلها واقفين جنبها فخوريين بكل حرف.

"أنا مش ناقصة، أنا كاتبة، وجعها صار حكاية، وحكايتها صارت أمل."



"الملاك"

كان "جاد" ماشي بطريق مظلم: تعاطي،
خراب بيوت، عصبية، ضياع.

كل يوم ييمرق كان عم يبعده أكثر عن
حاله، عن ربه، عن قلبه.

"كنت ماشي، بس ما كنت عايش. كنت
أتنفس، بس ما كنت حاس بشي."

جاد بليلة، قاعد على زاوية شارع،
سكران، شاحط على الأرض، إجت بنت
غريبة، مدّته مي وقطعة خبز، وقالتله:
"الرب ما خلقك هيك، قوم."

ما كان بيعرف اسمها، بس من هديك
اللحظة بلشت القصة.

اسمها كان "ليان" وما كانت متل أي
حدا عرفه.

ما حكمت عليه، ما شافته مجرم، شافت فيه شي هو نسي إنه موجود: إنسان.

بلشت تحكي معه عن الله، عن الرحمة، عن فرصة جديدة.

كانت تاخده عالجامع، وتقلّاه: "الله عم يستناك، مشان ترجع، مو ليحاسبك، بس ليغسلّك."

جاد بلّش يتغير.

ترك كل شي، بلّش يصلي، نظّف نفسه، رجع يشتغل بشرف، وصار يقول: "أنا ما رجعت كرمالها، أنا رجعت كرمال الله، وكرمال نفسي."

بس بعد شهور قليلة، ليان اختفت.

لا رقم، لا عنوان، لا خبر، ولا وداع.

وكأنها حلم مرق وراح.

دور عليها بكل مكان، ما لقي شي.
بس تركتله رسالة صغيرة كانت بإيده
من قبل وتناساها، مكتوب فيها: "أنا
مهمتي خلصت. ما أجيت لأبقى، أجيت
لتقوم. إذا بتحبني، صلي. وإذا بتشتاقلي،
ساعد غيرك يفيق، متل ما أنا فيقتك."
اليوم، بسببها، صرت شب مختلف.
بشتغل بجمعية بتساعد المدمنين.
كل ما بشوف حدا واقع بمدّ إيدي،
وبقله: "قوم، الله عم يستناك."
وبقلبي، دائماً في صوتها: "الحياة
أوقات بتبعلك ناس، مو مشان تحبهم،
بس مشان ينقذك، ويمشوا."

ليان راحت، بس الصحوة يلي زرعتها؟
ضلّلت، وعاشت، وصارت سبب
لصحوات غيري.

نسمات الادب

للنشر الإلكتروني

"حلو شعور الأمومة وإنك تكوني أم"

كانت هالجملة دائماً تتردد بقلبي، مش
بس لأنه حلم، لأنه إحساس، ونداء
داخلي ما بيشبه شي تاني.

أنا أكثر شي كنت بتمناه إني أكون أم،
إني أبني عيلة صغيرة مليانة حب، ودفا،
وأمان.

بيت يكون فيه صوت ضحكة، وريحة
خبز طالع من الفرن، وعيون صغيرة
تقول: "ماما".

كنت أتخيل طفل صغير يركض لعندي،
يبكي إذا غبت دقيقة، ويضحك إذا
حضنته.

كنت أحلم إني أعلمه أول كلمة، وأحكي
له قصة قبل النوم. كنت أجهز نفسي،

مو بس جسديًا، بل روحياً. أنضج،
وأصير قادرة أعطي حب بلا شروط. بس
أحياناً الحياة ما بتمشي مثل ما بدنا.
صارت فيني ظروف، تأخرت، تعبّت،
حسّيت إني عم ابتعد عن حلمي شوي
شوي.

صديقاتي صارن أمهات، وأنا؟ كنت أقنع
حالي إني بخير، بس جوّاتي كان في
فراغ كبير. لحد ما قررت إني ما
أستسلم. مو كل أمومة بتبدأ بولادة طفل.
في أمومة بتخلق مع العطاء، مع الحنية،
مع الحب اللي منقّده للي حوالينا.

صرت أحنّ على بنت أختي كأنها بنتي،
أحضن أطفال جيراني بمحبة، أساعد

أمي، وأعطي وقتي، وأهتم بتفاصيل صغيرة.

واكتشفت إنو "الأم" جوّاتي موجودة، حتى لو ما ناداني حدا بهالكلمة بعد.

مش كل شي منحبه بينحصر بشكل واحد.

يمكن الله يأخّر علينا شي، ليعلمنا كيف نعيش قيمته بطرق تانية.

الأم مش بس يلي بتولد طفل، هي يلي بتزرع حب، يلي بتصبر، يلي بتعطي، وبتعيل، وبتحضن كل ضعف حولها بدون شروط.

ويمكن بكرة يجي هالطفل اللي حلمتي فيه، ويحملك كلمة "ماما" بصوت

صغير، بس كبير لدرجة إنه يشفي سنين
الانتظار.

فلا تفقدي الأمل.

الحب الحقيقي دائماً بيوصل، حتى لو من
طريق مختلف.



نسمات الادب

للنشر الإلكتروني

"أنا بنتها، بس مش مثلها"

"مو كل خيانة بتكون بس قلبين، في
خانات بتقتل، بتدمر، وبتدفن أرواح
عايشة، أكثر وجع؟ لما تكتشف إنو موت
أغلى حدا عليك كان متعمد."

— ميس

جلست "ميس" قدام الدكتور "سيلا"،
وعيونها فيها وجع قديم، مو من اللي
بينحكي بسهولة...

كانت مترددة، بس صوتها أخيراً نطق.

ميس: "كل حدا بيفكر إنو أبوي مات
بحادث... بس الحقيقة؟ الحقيقة أوسخ
بكتير."

سيلا: "أنا جاهزة أسمعك، احكي متل ما
بتحسي."

ميس شدّت نفس عميق وبلّشت: "أمي
كانت دائماً تضحك قدام الكل. بس نحنا
كنا نعرف، أنا وأبوي، إنو شي فيها
مكسور، كانت ما تحبه، بس تضحك
معه. كانت تطبخ، بس بدون حب، وأنا؟
كنت أفكر هاد طبيعي، لحد ما دخل
'عماد' ع حياتنا."

"عماد" كان صديق قديم لأبوها، رجع
ظهر فجأة... بلّش يزورهم، يضحك
كثير، ويقرب أكثر من اللزوم.
ميس شكت، حسّت نظرات أمها لإله مو
بريئة بس سكّنت.

"بليّة من الليالي، سمعت صوت نقاش
بالمطبخ. صوت همس وضحك، وبعدين

سكوت. قلبي وقع، بس كمان سكّيت.
كنت خايفة أعرف."

وبعد شهرين، صار "الحادث". أبوها
مات. وانقال إنه كان "حادث سير بسبب
السرعة الزائدة". بس قلب ميس ما
صدّق.

بعد الدفن، لاحظت إنو أمها ما بكت.
ولاحظت أكثر إنو "عماد" صار يزورهم
أسرع من قبل. وليلة من الليالي، شافته
داخل ورا أمها على أوضتها... ما قدرت
تسكت.

"واجهتها، صرخت، قتلها: هاد بيت
أبي!

صرخت بوجهي وقالتي: أبوك كان
عبء!

ما عاد قدرت أسمع أكثر."

بس الكارثة الحقيقية كانت بعد أسبوع،
لما ميس شافت محادثة بين أمها
وعماد، فيها جملة وحدة: "انتهينا منو،
مثل ما خططنا."

ميس انهارت. "أمي قتلت أبي. مو
بأيدها، بس بعقلها، وبقلبها،
وبخيانتها." هربت، أخذت أخوها
الصغير، وسكنت عند عمته. كبرت قبل
عمرها بسنين، وصارت أم قبل ما تكون
بنت. بعد سنين ميس صارت شابة قوية،
مستقلة، شالت وجعها وسكرته بمفتاح
الإرادة.

رجعت عند سيلا، وبأيدها دفتر، قالتها:
"كل العالم شافوا فيني صورة أمي، بس

ما حدا شاف إني بنت الضحية، مو بنت
الجانية. أنا بنتها، بس مش مثلها. هي
خانت، بس أنا بدي أبني ثقة. هي
دمّرت، بس أنا بدي أخلق أمان.

سيلا مسكت إيدها وقالت: "ما كل بنت
بتشبه أمها، بس كل بنت بتقرّر تكون
شو. وانتي؟ قررت تكوني حياة، بعد ما
كنتي شاهدة على موت."

ميس طلعت من العيادة، ماسكة أخوها
من إيده، وقالتله: "وعد، ما رح نكون
مثلها. رح نكمل، ونعرف شو يعني عيلة
حقيقية."



"كنت غلطة عمره"

"مش كل حب بينكتبليه نهاية سعيدة. في
حب بيكون درسك، مو نصيبك."
- رهف

رهف كانت تحكي عنه وكأنو الحلم يلي
نزل على شكل إنسان. شاب اسمه
"يـزن"، حكى معا أول مرة بالصدفة،
وكبرت الصدفة، وصارت عمر. ثلاث
سنين ظلّوا مع بعض. ثلاث سنين كانت
تحكيه كل شي: أسرارها، خوفها،
ضعفها، حتى وجعها اللي ما حدا حس
فيه، هو كان يسألها: "شو أكلتي اليوم؟
شو لبستي؟ اشتقتيلي؟"

وكانت تحس إنه بسأل عن روحها، مو
بس يومها. كانت تعطيه من قلبها،

وهو؟ كان يأخذ وما يعطي. بس كانت
تحبّه. وكل مرة كانت تشك، تقنع حالها
إنو الحب أعمى، والقلوب ما بتكذب. لحد
ما إجا النهار الأسود.

رهف كانت قاعدة عم تقلب السوشال
ميديا، وهي عم تضحك، شافت صورة
صارت دموع.

"يـزن، لابـس بدلة، وواقف حد بنت،
والمكتوب تحت الصورة: خطبنا،
دعواتكم." انكسر فيها شي ما بيتصلّح.

"ما قلّي، ما لمح، ما ودّع. ثلاث سنين
حكي وكذب، راحوا بيوم. حسّيت حالي
غبية، وحيدة، وساذجة."

حاولت تواجّهه. كتبّ لها: "ما كان بيننا
شيء رسمي، انتي كبرتِي الموضوع، كان
تسلية، ما أكثر."
وتركها تقرأ الكلام وتتفجر.

بعد شهر من البكاء، والتعب،
والخذلان، رهِف كتبت رسالة، حطّتها
بدفترها القديم: "أنا حبيبتك بصدق،
وأنت خنتني بابتسامة. بس اليوم؟ أنا
عم بشكر الله إنك مشيت. لأنك كنت
درس، درس غالي، بس أنقذني من
مستقبل أرخص." وقفت قدام المراية،
شافت بنت بشعر فوضوي، وعيون
منتفخة، بس وراهم كان في قوة جديدة
عم تطلع.

رهف قالت بصوت واطي: "أنا كنت
غلطة بحياتك، بس أنت كنت حكمة
بحياتي." وراحت تكمل حياتها.
مش بدها حب، بدها كرامة، ووعي،
ونفس مرتاحة.



نسمات الادب

للنشر الإلكتروني

"كانوا يبيعوني بس أنا اشتريت نفسي"

"أنا ما تربيت، أنا اتكسّرت وتجمّعت
لحالي، بس اليوم، كل جزء فيني صار
شهادة على بنت ما بتموت."

— سارة

سارة بنت بـ 15 سنة، كانت تحب الدمى
والألوان وكلمة "ماما شوفي رسميتي".

بس بيوم أمها قالت لها: "لبسي فستانك
الأبيض، رح تتجوزي وترحي راسنا."

سارة ضحكت ببراعة: "عن جد؟ مين
العريس؟"

أمها نزلت عيونها وقالت: "واحد اسمه
كرم من العراق، كبير شوي بس رح
يعمّرلك بيت ويصرف علينا."

وهيك... انباعت. كرم، كان فوق
الأربعين، وقلبه متحجر. ما كان يعرف
لا حب، ولا حنية. كان كل يوم يصرخ،
يضرب، ويقال من إنسانيتها. وبعد
أشهر، ما اكتفى بالقهر، بل صار يشغلها
بشي ما بيرضي الله ولا بيرضي إنسان.
حبسها، ومنعها تحكي مع حدا.

بس سارة؟ كانت كل ليلة تحط راسها
عالوسادة وتقول: "إذا الله خلقتي، أكيد
ما خلقتي مشان أتعذب."

بيوم وهي عم تتظف بيته، لمحت جواز
سفرها، ومحفظته، ومفتاح سيارته. ما
فكرت، خافت، بس تحرّكت. ركضت،
وساقت، وهربت من الجحيم. وصلت
على بلد تاني، بلا حدا، بلا ليرة، بلا

سند. نزلت على ملجأ، نامت بالشارع.
بس ما باعت نفسها، ولا رجعت، رغم
كل القهر والجوع. بعد سنين، سارة
كبرت. درست قانون، وهي عم تشتغل
بالنهار وتدرس بالليل. ولما تخرّجت،
رفعت أول قضية بحياتها ضد كرم. كان
عندها إثباتات، وشهادات، ووثائق.
وقفت بالمحكمة، وعينها بعينه، وقالت:
"أنا البنت اللي اشتريتها، واليوم أنا
المحامية يلي رح تشتري عدالة كل بنت
متلي." كرم انسجن وانفضحت قصته
بكل مكان. وأهلها؟ ندموا، بكوا، حاولوا
يبرّروا. بس سارة؟ ردّت ببرود مؤلم:
"كنتوا أهلي، بس ما كنتوا حضني."

حققت حلمها سارة، وصار عندها مكتب
محاماة صغير، بس كبير بالحكايات يلي
بتحكيها للبنات يلي فقدوا الأمل. على
باب المكتب، في لوحة بتقول: "ما في
شي اسمه مصير أسود، في قرارات
بيضا بتتاخد بأشد اللحظات سواد."
وسارة؟ صارت اسم، وصوت، وعدالة
تمشي على الأرض.



"ظلّ الخوف"

كريم كان شاب عادي بالنسبة للناس،
بس جواه كانت في معركة ما حدا يعرف
عنها.

الخوف كان ماشي معه مثل ظلّه. مو
خوف من شي معيّن، بس إحساس دايم
إنو في خطر جاي، حتى لو الدنيا آمنة.
بالليل كان يفيق فجأة على صوت قلبه
يدق بسرعة، وبالنهار كان يتجنّب
المواقف، الناس، والتجارب الجديدة.
كان يعيش وكأنّ الخوف حارس على
بابه، ما بيسمح له يطلع.

"الخوف مو بس بيحبسك، بيصغرّ العالم
حواليك." بيوم من الأيام كان ماشي
بالشارع وشاف طفل صغير واقف بنص

الطريق، والسيارة جاية بسرعة. بدون
ما يفكر، ركض وأنقذ الولد. وقف كريم
وهو يلهث، والناس حواليه عم تشكره،
وفجأة حسّ إنو لأول مرة نسي خوفه،
ولو للحظات. رجع عالييت وهو عم
يفكر: إذا قدرت أتحرك بهالموقف، ليش
ما أقدر أتحرك بحياتي؟ من هديك
اللحظة، قرر كريم يواجهه الخوف شوي
شوي.

أول خطوة: يروح لمكان جديد لحاله.
بعدين: يحكي مع ناس ما بيعرفهم.
بعدين: يجرب شي كان دايماً يتجنبه.
الخوف كان لسه موجود، بس صار
أصغر. صار يعرف إنو كل مرة يواجهه،
بيخسر جزء من قوته. بعد أشهر، وقف

كريم على مسرح صغير بمكتبة الحي،
ليحكي عن قصته مع الخوف. إيديه
كانت عم ترجف، بس صوته كان أوضح
من أي وقت. حكي قدام الناس، وانتهى
التصفيق بابتسامة كبيرة على وجهه.
"اكتشفت إنو الخوف ما بيروح نهائياً،
لكن لما توقف بوجهه، بيصير هو اللي
يخاف منك." الخوف شعور طبيعي،
لكنه ما لازم يكون قائد حياتك. هو مثل
ظلك، بيضل وراك، لكن إذا مشيت باتجاه
النور، بيصغر. "الجرأة مش غياب
الخوف، الجرأة إنك تتحرك رغم
وجوده."



"بعد الخذلان، نور جديد"

رنا، بنت هادئة ونيتها طيبة. انتقلت
لمدرسة جديدة، كانت متوترة، بتحاول
تلاقي مكان تنتمي إليه. بتقعد بآخر
الصف، وبتبقى ساكنة. بس بعد أيام
إجت عندها بنت اسمها نيروز ومعها
رفيقتين: هيا ولمى.

نيروز بضحكة مزيفة: ليش لحالك؟ تعي
اقعدى معنا.

رنا بابتسامة خجولة: عن جد؟ شكراً.

صارت تمشي معهن، تحكي، تضحك،
وتشاركهن أسرارها، بس ما كانت
تعرف إنهن عم يضحكوا عليها من ورا
ظهرها، ويستخدموا طيبتها لمصالحن،

مرة سرقوا دفترها، وصاروا يقرؤا شو
كاتبة قدام الصف.

هيا بصوت عالي: "بتمنى كون محبوبية
متلن"، واو! يا عيني عالتقة بالنفس!

ضحك الصف، ورننا ركضت تبكي.
"أوقات منفتكر إنو لقينا أمان، بس
بيكون وهم اسمه خيانة." رنا انسحبت
من الكل، ما عادت تحكي ولا حتى تطلع
من الصف، الدنيا صارت رمادية والثقة
راحت، كل يوم كانت ترجع عالييت
مكسورة.

أمها: شو صاير معك؟ وين راحت بنتي
البشوشة؟

رنا وهي عم تبكي: ماما أنا غلطت،
وثقت بناس غلط.

بنهار خريفى، كانت قاعدة لحالها
بالساحة وإجت بنت قعدت جنبها.

بتول: مرحبا، فيني أقعد؟

كانت بنت اسمها بتول، وبجنبها كانت
هدى بنت مرحة.

هدى: سمعنا إنو البنات أذك، بس
بصراحة، نحنا مو متلن.

بتول بلطافة: نحنا ما بنحب نصادق
الكل، بس شفنا فيكي طيبة، وحبينا
نكون أصحابك إذا قبلتي.

رنا حسّت شي غريب بقلبها... شي
اسمه "أمان حقيقي". "بعض الناس
متل ضو القمر، بيجوا بعد عتمة طويلة،
وبيخففوا الوجع بلا ما يحكوا كثير."

صارت تمشي مع بتول وهدى، ضحك،
جد، دعم، صمت حلو، وصداقة نضيفة.

رنا قامت من حزنها شوي شوي، رجعت
ترسم، تكتب، وتعيش. بيوم من الأيام
شافت نيروز وهيا ولمى قاعدين لحالن.

نيروز بهمس: شو، نسيتينا؟

رنا بابتسامة قوية: لا، بس بطلت
أستحق هالنوع من الناس.

"مو الكل بيستاهل قلبك." كبرت رنا
وصارت تعرف تميز، مو كل حدا بيقرب
بيكون خير، ومو كل بعد وجع في نهاية
حزينة.

مع بتول وهدى عرفت شو يعني أخت،
مش بس بالدم... بالروح.

"مو الكسر اللي بيكسرنا، هو الغلط إذا
كررناه، في ناس بتخون، وناس
بتداوي، والحياة دايماً بتعطي فرصة
تانية بس لازم نختار صح."



نسمات الادب

للنشر الإلكتروني

"بسمة بعد الوجع"

آدم ونور كانوا يعرفوا بعض من هني
وصغار، بنفس الحارة، نفس المدرسة،
نفس الذكريات. يكبروا سنة ورا سنة،
والقلوب تكبر معهم. آدم، شب بسيط،
قلبه أبيض، وعيونه بتحكي أكثر من
لسانه. ونور، بنت خجولة، بس
بضحكتها في ضو بيعمي التعب. بعمر
الـ17، صار الحكي أوضح، والمشاعر
أصدق.

نور: آدم، بتصدق إنك أول وأكثر حدا
بفكر فيه قبل ما نام؟

آدم بخجل: وأنا... إنتِ أول وآخر. كانوا
يحكوا ساعات، يحلموا ببيت صغير،
وأولاد، وسفر، وأمان. ما كان في شي

كبير، بس كان في حب كبير. مرت
سنين، كبروا شوي، وهو صار يشتغل
ليقدر يصير شي قدّ نور. وهي دخلت
جامعة خاصة، بيئة جديدة، ناس جدد.
بس ضلّوا على تواصل، على وعد، على
حب صادق. كان يبعقلها ورد على باب
الجامعة. وكانت تبعته مسجات مليانة
حنية وقت استراحته بالشغل.

آدم: أنا عم بيني مستقبلي مشانك، لا
تروحي.

نور: شو هالحكي؟ أنا معك لو شو ما
صار.

بيوم مفاجئ نور سكّرت تليفونها، ما
عاد ترد، ما عاد تبعت، ما عاد موجودة.

بعد أيام وصل لآدم خبر: "نور انخطبت
لشخص عايش برا، بيش تغل ومرتاح
مادياً، أهلها شافوا فيه فرصة." آدم
حسن إنو قلبه توقّف. ما كان عم
يستوعب... كيف نور، اللي وعدته،
تركته؟ كيف الحب اللي عاشوه، صار
ذكرى؟ بكى... أول مرة بحياته يبكي من
كسر، مش من تعب. "مو كل حب
بنعيشه بيكمل، وفي ناس منحبن، بس
ما بيكفي." مرت شهور وآدم ضلّ
عايش عالهامش، كل شي حلو صار
يذكّره فيها: الشارع، الرسائل، العطر،
وحتى الوردة اللي نشفت بكتاب قديم.
حاول ينسى، بس ما قدر. صار يشتغل

ليل نهار، مشان ما يفكر. بس الوجع
كان أقوى من التعب.

بيوم فات على مكتبة صغيرة ليشترى
دفتر. البياعة كانت ست كبيرة، شافت
الحزن بعيونه.

الست: مالك؟ قلبك وجعان؟

آدم بابتسامة حزينة: ما عاد فيني أحب.

الست: لا تقول هيك، الحب الحقيقي ما
بينكسر... بس بيتعلم. رجع على البيت،
فتح الدفتر وكتب أول صفحة: "أنا ما
خسرتك، أنا ربحتني، كنت عم بدور على
حب، بس لقيت ذاتي."

"رجعة آدم" بعد سنتين صار آدم كاتب،
نشر كتاب اسمه: "وما كنت إلها" حكى
فيه عن الوجع، عن الحب، عن

الخذلان... وعن النهوض. الكتاب
انتشر، وكسب احترام ناس كثير. صار
يلقي محاضرات عن العلاقات، والشفاء،
والنضج. ونور؟ رجعت تقرأ عنه من
بعيد. حياتها ما كانت مثل ما تخيلت،
وقلّ الضحك من عيونها. بس آدم؟ كان
واقف شامخ، نضيف، ومتعلم. "في ناس
بتجي تعلّمنا الحب، وفي ناس بتعلّمنا
نحب حالنا، وآدم اختار يحب حاله." مو
كل حب لازم يكمل ليكون حقيقي. يلي
بيتركك، مش ضعف منك... يمكن ضعف
منه. النضج الحقيقي؟ لما توجع وتقوم.
والقيمة الحقيقية؟ مش مين حبك، بس
مين ما غير قيمتك رغم الوجع.



"أنا الكبير يعني أنا الكل"

"بوقت ما كنت جاهز كون أب، ولا كبير، ولا مسؤول، بس لما الوجع ما بخيّر، بتختار تكون جبل، أو تكون تراب، وأنا اخترت أكون جبل، حتى لو كل يوم بينهار مني شوي."

— عادل

عادل، شاب بعمر الـ23، ما كان بدّه من الدنيا غير يعيش بسلام مع أمه وأبوه وأخوته الصغار. بس الحياة ما سألت شو بدّه. حادث سير خسر فيه أهله اتنين. أمه وأبوه راحوا بلحظة وتركوا وراءه ثلاثة أطفال عيونهم ما بتعرف غير وجهه. من وقتها صار "الكبير" غصبًا عنه. ما عنده بيت، ولا دخل، ولا حدا

يسنده. راح يقدّم على شغل، قالوله: "ما
في خبرة، ما في شهادة، ما في مكان
إلك."

قدّم غيره، وانرفض. باع موبايله،
وباع كل شي يملكه، واشترى خيمة.
نصّبها بزاوية مهجورة، وسماها
"بيتنا". يطبخ بإيده، يدرس إخواته،
ويفرش لهم الأرض بإيده، وكان دائماً
يحكيهم قبل ما يناموا: "إذا بكرنا جعنا،
ما تزعلوا... أنا رح لاقى شغل."

بس الجسم تعب، والمعنويات نزلت.
وفي ليلة شتوية، وهو راجع بدون شغل
وبدون أمل، وقع. وقع بوجهه بالأرض،
بردان، جوعان، ومنهار. بس لما سمع

صوت أخته الصغيرة عم تصيح:
"عادل؟! وينك؟!"

عرف إنه ما إله حق ينهار. وقف، مسح
دمعه، وحلف: "طالما أنا بتنفس، إنتو
رح تعيشوا."

باليوم اللي بعده، طَرق باب فرن، وطلب
شغل بأي شي. نظّف الأرض، غسل
الصحون، واشتغل بلا كرامة، بس
بكرامة قلبه. كل يوم، يرجع لعند
إخواته، ومعه خبز وضحكة مزيفة، بس
صادقة بالحب. مرّت سنة. أخذ منظمات
تساعده، وساعده يكمل دراسة مسائية.
تخرّج، وصار موظف رسمي، وقدم على
بيت صغير بالإيجار.

وفي يوم عيد ميلاد أخوه الصغير، جابله
كيك صغيرة، وكتب عليها: "كبرت لأنو
فيني، ووقفت لأنكن ورايي."

اليوم، عادل صار موظف بسيط، وعنده
بيت صغير. بس بيقول دائماً: "أنا ما
نجحت لأنو الطريق كان سهل، نجحت
لأنو ما خلّيت شي يكسر قلبي أكثر من
حبي لإخواتي، ولما يكون عندك سبب
تعيش عشانه، بتصير الحياة أهون، حتى
لو كل شي ضدك."



"بيت من تراب"

رامي كان عنده كل شي: بيت واسع،
سيارة جديدة، شغل ثابت، وحياة
محسوبة خطوة خطوة.

ما كان يتخيّل إنو بيوم واحد، ممكن
يخسر كل هالأساس اللي تعب عليه
سنين.

في نهار خميس، رجع من شغله، لقي
باب البيت مفتوح، وأوراق المحكمة
على الطاولة: الشركة اللي بيشغل فيها
أعلنت إفلاس، وأرض البيت فيها مشاكل
قانونية.

كل شي كان إله، صار مهدّد يروح.
جلس على الأرض، ماسك راسه، كأن
الجدران عم تضيق عليه. موبس

البيت... حسّ إنو خسر نفسه. مرّت
أسابيع وهو عاطل عن العمل، يتنقل بين
بيوت الأقارب. كل مكان كان يحسّه
مؤقّت، كل يوم كان بلا معنى. اللي
وجعه أكثر من الخسارة المادية، هو
شعور: "ما عاد عندي مكان أنتمي له."

صار الليل أطول، والنهار أفرغ من
الصمت. "أصعب من الجوع، إنك تحس
حالك بلا أرض، بلا جذر." بيوم، كان
ماشي بالشارع، وشاف عمّال بناء عم
يبنوا بيت جديد. وقف يراقبهم، وشاف
الأساس قبل ما يطلع أول جدار. فكّر:
"يمكن أنا كمان لازم أبدأ من الصفر...
وأبني أساس جديد."

قرر يتعلّم مهنة جديدة: النجارة. أول فترة كان شغله بسيط: إصلاح طاولات وكراسي قديمة.

بعدها صار يشتغل على مشاريع أكبر، ويبيعها أونلاين. مع كل قطعة كان يصلّحها، كان يحسّ إنو عم يصلّح نفسه. صار عنده زباين، وأول دخل ثابت بعد شهور طويلة. بعد سنتين من التعب، اشترى رامي شقة صغيرة. مش واسعة، ولا فخمة، لكنها كانت من عرق جبينه، وعلى أسس أقوى من قبل. وقف على شرفة بيته الجديد، وقال بصوت واطي: "هالمرّة البيت مبني جوّاتي قبل ما يكون حوالّي."

كل سقوط هو فرصة لتبني أساس أقوى.
البيت الحقيقي مش الجدران، البيت هو
الأمان اللي تبنيه جواتك.
الخسارة أحياناً بتكون بداية الطريق،
مش نهايته. "إذا راحت الأرض من
تحتك... ابني جناحاتك."



نسمات الادب

للنشر الإلكتروني

"العودة من حافة الظلام"

رغد كانت بنت هادئة، تحب الكتب والرسم، وما تحب تختلط بالناس كثير.

لكن من عمر الـ16، صار عندها فضول غريب... فضول لتجرب أشياء غامضة وتدخل أماكن مظلمة.

بدأت تشوف أشياء ما حدا غيرها يشوفها: ظلال تتحرك في زوايا الغرف، أصوات همس في الليل، أحلام ثقيلة مليانة وجوه مخيفة. بدل ما تهرب، كانت تحاول "تجرب" وتشوف أكثر.

كانت تقول لنفسها: "يمكن خيال، يمكن وهم... بس بدي أعرف."

مع الأيام، صار الليل أكثر رعبًا. تحس كأن في عيون تراقبها حتى وهي لحالها،

وأصوات تنادي اسمها. صرختها ما كان
يسمعها أحد. بدأت تتغيّر: وجهها
شاحب، ضحكاتها اختفت، وصارت
عصبية ومتوترة. حتى أهلها حسّوا إن
في شي غريب صاير معها. ليلة باردة
صحيت رغد على صوت طرقات خفيفة
على باب غرفتها. فتحت الباب... ما كان
في حدا.

لكن على الأرض، كان في ورقة مكتوب
فيها: "رجعي قبل ما يفوت الأوان."
حسّت قلبها يوقف. وقتها تذكّرت كل مرة
تجاهلت فيها الصلاة، وكل مرة أغلقت
المصحف وهي قادرة تكمل. وكأن
الرسالة مو من بشر، بل تحذير من الله.

في الصباح، جلست رغد على سجادة الصلاة بعد غياب طويل. أول تكبيرة... حسّت الدموع تنزل بدون ما تدري. فتحت المصحف، قرأت صفحة، ثم صفحة أخرى، ثم شعرت براحة ما حستها من سنين. بدأت تحفظ القرآن آية آية، وكل ما كانت تحفظ أكثر، كانت الأصوات تضعف، والكوابيس تختفي.

صارت تقول الأذكار قبل النوم، وتقرأ سورة البقرة في البيت. بعد أشهر، رغد تغيرت تمامًا. صارت ملامحها هادئة، وابتسامتها راجعة، وعيونها مليانة نور. حتى أهلها لاحظوا إن البيت صار فيه سكون غريبة. وصارت تحكي للناس قصتها، وتحذّرهم من الفضول اللي يفتح

أبواب الظلام. بعض الأبواب لازم تضل
مغلقة، حتى لو الفضول يلحّ علينا. أقوى
سلاح ضدّ الخوف هو الإيمان والقرآن.
النور الحقيقي يبدأ من السجدة الأولى
بعد الغياب.

"اللي بيحتمي بكلام الله... ما بيخاف من
شي."



نسمات الادب

للنشر الإلكتروني

بكل قلم قصة

“

قصص مختلفة لكن خيط واحد
يجمعهن أن السقوط هو يعني النهاية،
وفي قلب كل وجع في بذرة أمل
بتستني نسقيها بالإيمان والصبر
الكتاب هاد مو بس مجرد حكايات هو
مرآة يمكن تشوف فيها حالك وايد عم
تمسك فيك لتوقف من جديد

”

أسماء هيثم حمود



تصميم الغلاف: رزان محمد كليب